

荔隱山房詩草

卷上

序

海屏夫子淵源家學詩古文詞蚤歲有聲尤喜爲古今
體詩興會所至走筆立就楮刻而墨采飛詞成而珠玉
落其旨要歸於中正餘易自咸豐辛酉登拔萃科次年
舉京兆試同治甲戌成進士膺館選結

主上之知一典試黔中再分校順天闡前後垂三十年
身世之感遇友朋之贈答蹤迹遊歷之所經皆紀之以
詩手輯其未散佚者得若干首附以瀛洲試律都爲六
帙示勲讀之且命校字不敢辭蓋嘗試論之發乎情止

乎禮義詩之正也。怨誹而怒和樂而流詩之變也。世之爲詩者大率其未遇時不勝其憔悴憂傷一旦志得意滿則流蕩叢雜之紛逐鄭聲滿紙二者交譏求所爲中正和易詎有當焉。吾師之詩不然當其懷抱利器抑鬱誰語託之於詩而無愁苦悲憤之音及其游詠蓬島著作承明麻詔宣呼輶車顯赫發之於詩而無流僻邪散之響卽或烟波一湖觴酒一詠山水寫性草木證情則涉筆而成趣會意而見理由其樹骨高而取徑正也至於練字則不失於纖弱琢句則不病於譎詭命意則

不類於淺率立格則不流於卑靡斯又吾 師精神福澤
之源流露於迹象發見乎詞章者 勲於此道未窺門徑
率抒管見未必有當萬一既幸得讀是詩爰綴數語以
識不忘云時光緒甲午八月受業戚朝勲謹叙於都門
寓邸

家傳

公名□□字□□耐盦其別號也世居莆陽西關外之
莒溪曾祖□□躬有令德隱而不仕祖□□邑廩士遷
入城世爭延課子弟如楊琢如孝廉鄭鵬圖鵬培司訓
昆弟皆從之學父□□幼稟庭訓未冠入邑庠食廩餼
中道光丙午科舉人截取知縣就廣文職歷任彰化安
溪政和建甯各縣學官掌教臺灣書院興安書院課士
講學至老不倦著有慎餘齋文集行世公生而岐嶷過
庭讀父書寓目成誦自少卽喜覽歷史及各大家集頗

既吟詠年十六補郡弟子員爲吳晴舫李小湖二文宗
所賞識試輒優等己未肄業鰲峰書院郭遠堂山長器
之課以詩古文辭業益進辛酉選拔萃北遊舉京兆試
在都與杜蓮衢楊子恂鄭海鄒諸公遊癸亥乙丑會試
並薦卷堂備丙寅夏左文襄帥閩招入幕隨辦里中土
匪獎叙知縣丁卯己巳遊泉漳在朱懋勛觀察羅景山
軍門幕中辛未補咸安宮漢教習期滿將分發矣甲
戌成進士改庶吉士丙子散館一等授翰林院編修充
國史館協修時鄉人同館試者四人皆居末等有鼎

甲黃某亦降出署獨公留公居詞垣不爲章句學每泛覽本朝政治掌故及歷代地理山川險要風俗利弊考究得失源委求有用之學與同人會課讌集談諧閒作公恂恂若不能言己卯銜命典試黔中黔離都七千餘里輶車經歷諸名勝三閱月有使黔日記入闡後悉心校卷秉公去取得士如額若戚家趙家諸昆季同榜皆省中知名士也出闡聞訃丁母陳太夫人憂奔歸里喪葬如禮服闋將告養而太封翁尚健促以入都供職壬午還朝充國史館纂修功臣館纂修總纂本

衙門撰文時館局正開公昕夕入直秉筆勤慎編輯昭
忠祠列傳及大臣傳二十卷手自鈔掇無暇晷書告成
議叙加侍講銜歷次派撰大臣碑祭文 萬壽告祭岳
瀆文 翊坤宮萬壽燈聯皆曲盡事實詳略悉當每奏
一編 上未嘗不稱善甲申海氛起臺灣及馬江告嚴
里中士匪蠢動公時接家書憂憤畢集密疏陳其事公
未嘗以語人人亦莫之知也乙酉奉 命分校順天鄉
闈簽掣第十四房公益自喜奮侍坐堂皇選卷呈薦終
日無倦容盖公壬戌中順天榜曾出十四房故也揭曉

亦多名士次年丙戌會榜門人劉君培連捷得元黔士
趙君以燭廷對第一會狀皆出其門而閻君志廉戚君
朝卿楊君鍾義岳君齡趙君增琦亦遂相繼登第入玉
堂矣是冬京察一等復帶記名以道府用 召見養心
殿躬聆 聖訓益切感悚旋得家書太封翁病請假出
都抵家而太封翁棄養公哀毀逾恆讀禮在籍親往西
關造墳葬太封翁於霞磨之佛岡山又建家廟奉安栗
主焉戊子郡守施敏先招掌興安講席己丑入都仍奉
派充各館差庚寅在賈家胡同重建莆陽新館捐俸籌

倡鄉人便之辛卯甲午兩次京察一等各加一級金厯
充鄉會試磨勘官恭逢 太后六旬萬壽奉派撰內廷

各宮柱聯百副書以進呈十月引 見以知府分發浙

江補用抵浙未兩月奉委杭嘉湖閱操八營水師公單
舸而往謝絕供帳嚴密點操一旬而畢回省見重上官

又委江干釐差公從事二年嚴督司巡剔除諸弊上游
稱獎記功公餘稍暇與諸同寮遊西湖有浙遊日記冬
間以賑捐請獎加三品銜賞戴花翎而公宦興淡泊遽
賦遂初遊靈隱寺詩有玉堂不住況黃堂之句戊戌歸

里修葺華園舊墅隱居其中閉門掃軌罕與世接日惟澆花種竹移石鑿沼自娛當道復延主興安講席不獲辭六七年來憑文甲乙課士之餘則搜輯鄉先輩遺編殘帙網羅散失晨書暝寫躬自校勘有莆陽文輯十卷莆陽詩輯四卷梓以行世又編次舊作古今體詩及雜文日記刊有荔隱山房集五卷晚歲益耽書籍朝夕披覽手不釋卷其嗜學好古之興老而彌篤學堂旣興當道延公爲教育會會長公雖年高而肆應庶務神明不懈乘興遊榕垣與同年葉芭恭子翔何秀臣諸君登烏

石山泛舟臺江覽古歌詩興復不淺又渡省垣高等
法政師範各學堂與諸公考究規制逾兩月始歸丁未
秋往楓葉山築生墳命匠建華表望柱明器賦詩四章
刻巨石上公體素健少疾病晚年講衛生之學永訪藥
餌修合丸劑方書未嘗去手著有衛生集語己酉冬驟
得風疾半體拘攣委頓牀褥將一年自是氣體亦少衰
矣時宣統二年庚戌七十有四歲也

閻志廉撰公祝五十壽文

國家之設翰林院以儲才也射策求賢必賢董方云稱
職宏文啟館若房杜乃號得人使其文不足以擅三長
學不足以輯七略識不足以通變才不足以濟時等鷄
之在梁同雉之竄囿若此者吾無論已亦有洞晰天人
出入子史而草元文於尚白之年官雖落拓納孔軌於
用黃之日世謂迂疎支寶鼎以挂車用太阿使穿履此
之不遇猶可言也豈有陸語霏新歡呼左右孔誦號獨
名震都京而學五技而皆窮官十年而不調然則孝標

辦命之論昌黎復志之賦豈無謂哉我

海屏夫子莆陽世族藝苑詞宗生漁仲之鄉搜羅易富
近芝山之館陶淑尤多擬荷戟以觸羝對楊梅以孔雀
蓋自挽髻承訓固已巉角稱奇矣既而縱觀百代杜庫
曹倉揮洒萬言韓潮蘇海由拔萃登進士第得館職爲
纂修宮雄辭叠峻最善凌雲大筆含元惟工書曰賞其
文者推爲我輩讀其賦者詫曰仙才然而我

夫子自視歆然不自足也以爲黃甲書名仕途發軔青
簡著錄學海餘波士旣通經必當致用豈以詞賦爲言

子以翰墨爲勛臣哉已卯科典試黔中乙酉科復爲順
天鄉試同考官兩執文衡允孚衆論珠遺赤水象罔能
求銅式金門方臯善相某等之所以不棄於時者猶賴
夫子宏獎之力也時

夫子方充 國史館纂修功臣館總纂本衙門撰文蘭
臺仙吏天祿閣得校秘書松雪前身集賢院兼修國史
高文典冊體大思精乙酉京察一等丙戌復帶記名以
道府用昔王智深撰宋紀告成於豫章王王曰須卿書
成當相論以祿詎非以玉堂直宿清極生寒金管含毫

枯猶待潤哉胡爲乎脈望三餐依然作蠹臬盧十擲輒
復成鍵叙勞則事等鏤冰進職則虛同畫鏡翟公門巷
冷欲張羅阮子屏當累惟蠟屐人謂力田不如逢年善
仕不如遇合其

夫子之謂矣然而

夫子不爲芥蒂也豈不以河從積石九曲方通山有豫
章七年乃識鵬翼待扶搖而後舉龍泉經盤錯而始銑
壯志未磨晚成何礙況乎十年攻苦夙無宦情七尺昂
藏偏多傲骨堂名醉白羨清興於樂天散淪漆青間養

生於叔夜方將尋大隱於市朝等窮通於寒暑豈以鼎
無列雉車少鳴騶謂足汨我靈臺塵予智府云乎哉今
者籌添鶴算方昔人服政之年曲奏鳳來正摩錫嘉名
之日孔稚圭詩文跌宕頓遣世情李元忠藥鼎鍊連不
關家事況手林下同風盤中偶句謬兒孫以畫荻喜家
子之捋芹宵讀分燈花開四照晨趨獻綵樹過三株室
家之和氣與融杖履之春風自在某等緣深翰墨幸點
朱衣契結詩書時依絳帳征輶南使未遑立雪程門奎
斗北瞻猶憶焚香唐幕春來嶺外驛使遙通瑞紀崧生